

BÀ SÓ PIYÉTÒRÒ

Bà só bà cu wáràgà mì Piyétòrò

¹ Nìno a ye tí Simónè Piyétòrò tí bòò, delè tí tú, mì Jézù tí Bìndi-Mbírì ká kù cu wáràgà tí nó jì yo tí ndâ 'duù tí nó náa Mbírì wu bà ùnje gítí wó tí Mbírì jì yo 'vii ká 'vii go òndi ze, á ta rẹ̀ mì Mbírì mì ndoo tí Jézù, tí Bìndi-Mbírì, tí mbe 'vala ndoo, tí jáá 'duù, mbe bàkà 'bè gbí òkò tí ndâ 'duù lá nó gí.

² Có gbí njembí ye éno máa, Mbírì 'ví si nambeè mì wó 'ví dù kù jò jì yo, yí delè 'ví si njembí yo ta o 'dáá gí 'ví dù ká 'dèè kpóó á 'do gbí bà òò Mbírì, delè ta bà òò Jézù tí Mbe tí ndoo, mì yo ni ngbàrángà'i.

Bà 'vala go i mì ndâ mbe kù ru ndi Mbe tí ndoo

³ Mbírì 'do gbí 'dóó wotí mì wó kaa ndâ i òno mbe si ndoo 'ví 'vala go có mì wó tí Mbírì nó jì ndoo, 'do gbí có bà òò 'duù tí nó mbe tè'é tí ndoo ta nambeè mì wó gí gbí ngba wó tí Mbírì nò.

⁴ Mbírì kaa ndâ kpo-kpò kpóló-kpolo i-nambeè tí nó jì yo tí ndâ i mbe ci yo gítí bà kù'ba 'do tí ndâ i òno mbe kù volo to tí nó nò, tacó wàa yo 'ví dù gbí òkò tí ndâ 'duù tí nó mbe je tú yì tí Mbírì nò.

⁵ Nìno a gbí nderè có tí nó náa yo 'ví kili ta ndòngbú wotí mì yo, wàa yo 'ví gbo bà tee njembí yo mítí Mbírì mí nje bá, ta bà dù tí ndâ tó 'duù;

⁶ yo 'ví gbo bà dù tí ndâ tó 'duù mí nje bá, ta bà ò Mbíri ni ta njembí yo; yo 'ví gbo ndâ bà zèè njembí mí nje bá, ta gbèè njembí;

⁷ yo 'ví gbo gbèè njembí mí nje bá, ta bà bàkà go có mì Mbíri; yo 'ví gbo ndâ bà bàkà go có mì Mbíri mí nje bá, ta bà zè tí yo gbí òkò tí yo nìkì go ndâ ná'vindí; yo 'ví gbo ndâ bà zè tí yo nìkì go ndâ ná'vindí, ta bà zè ndâ 'bí 'duù ta njembí bà zè Mbíri.

⁸ Ndâ i tí nò náa ye 'deke ndú ji yo nò má kuu mì yo tókà'i, ndú bà si yo 'ví dù tí ndâ sú 'duù ta i gbí yo wálá nò wálá. Ndú bà si yo 'ví ò Mbe tí ndoo Jézù tí Bìndi-Mbíri ni .

⁹ Káa ndâ i tí nò náa ye 'deke ndú ji yo nò má mì 'duù wálá, yí a mbe sú ọ, mbe zeke'o dí tà lá. Yí delè a 'duù ònó mbe ò-bà-mbí ndâ ká vò i mì wó náa à caka ndú gí nó gí.

¹⁰ À má ènò, ndâ ná'vindí ye, yo bàkà ndootí tacó bà túbà ènó máa, Mbíri táánò tè'é tí yo, bìndi yí gii ọka yo gí. Yo má bàkà ndâ i tí nò náa ye 'deke ndú ji yo nò gí, yo bà ne 'do tí jáá kpokèjì wálá,

¹¹ Mbíri delè bà njaa njekèjì ngàà ji yo tacó bà dù tí ndâ bọ̀-gba mì Jézù, tí Bìndi-Mbíri tí Mbe tí ndoo tí mbe 'vala ndoo dúú bà ya tí .

¹² À má ènò, ye ta o 'dáá gí bà dù kú 'va mbí yo gítí ndâ i tí nò. Yo tà kpétí má ò ndú ni sàà kùro gí, yo delè tà kpétí má kú co ká ndíri tí kpokèjì mì yúco.

¹³ Ye koọ có máa àá mì ye a nderè tacó bà dù kú 'va mbí yo gítí ndú kpónó si sè bà ọ ye kuu tí nó,

14 tacó ye nò ni gî máa ye kpónó gí tí ɾi-'dê'o gî, tacó Mbe tí ndoo Jézù tí Bìndi-Mbírì 'dè ji ye ngbáràngà'i gî.

15 Káa ye bà kili sè wotí mì ye tacó bà túbà ta kpokèjì bà si mbí yo 'ví dù tí ndâ i tí nò á bìndi bà ya ye gí tàkò ndâ ká gù ye.

Ze táánò nò ngba Bìndi-Mbírì ta ɾo ze gí

16 Ze táánò cè ji yo me cè tìrì náa ze 'di 'do gbí nje 'bí 'duù ta o tí nó náa ze 'dè ta có ji yo gítí wotí, delè ta có gítí bà gí mbe tí ndoo Jézù tí Bìndi-Mbírì nó, lá. Ze táánò nò wotí mì wó ta 'dóó ɾo ze.

17 Tacó ta o tí nó táánò náa Mbírì Buù te ta duù mítí Jézù, yí delè je ta wotí ji yí nó, ze gíi 'di kòcò Gba-gbírì kù 'dè có máa, «Ìjìnó a 'Viì mì ye tí wú-gbí-ré ye, náa tàkòcò ye peteke gítí wó ngé ndii gî,» nó,

18 ze 'di kòcò Mbírì ta o tí nò kù 'dè có 'do gbírì gí, tacó ze ta o tí nò ta ndâ Jézù pí gú tí nò tí bàndò mì Mbírì nò.

19 Tacó ènò, kponje nje ze gítí có mì ndâ ká mbe 'dòkò có mì Mbírì wálá. Yo má 'di có tí nò, àà bà nìkì ji yo ngé ma. Tacó có mì ndú go wu mbe kù zìi nje kùpò gbí 'dí'di'o, mbe kù zìi yee tí o bà co dōngú ta nje yé yee tí bà too yé, kù gbí njembí yo.

20 Kpédélé có náa yo 'ví te mí gbí muu yo a ñínó máa, 'bí có mì ndâ ká mbe 'dòkò có mì Mbírì gbaànjé gbí wáràgà mì Mbírì náa 'duù 'ví 'dè gbí go 'dóó có mì wó mbe nìkì tí wó nò wálá.

21 Tacó 'bí có mì ndâ mbe 'dòkò có mì Mbírì náa ndú cu mí gbí wáràgà mì Mbírì mbe gí 'dò

gbí muu ndú nò gbaànjé wálá. Ndú 'dè ndâ có tí nò 'dáá gî ká ta wotí mì Bèrì-mì-Mbířì mbe gí 'do mì Mbířì.

2

Ndâ sú mbe nìbà i

¹ À kpêtí ká éno, ndâ 'duù tí nó táánò mbe bàkà tí ndú tí ndâ mbe 'dòkò có mì Mbířì nó oloko gí gbí ngba řì 'do ká gbí òkò tí ndâ 'duù, jé ká go ñínó náa ndâ mbe bàkà tí ndú tí ndâ mbe nìbà i kèjì gí bà oloko gí gbí ngba řì 'do gbí òkò tí yo nò. Ndâ 'duù tí nó náa ndú kèjì gí bà bàkà tí ndú tí ndâ mbe nìbà i nò, bà gí ta vò sú ña bà nìbà i mì ndú nò tàbèngì. Ndú delè bà 'boo mbe tí ndoo tí mbe sì ndú nó gî; bà 'boo mbe tí ndoo nò a i mbe ngo've bà ja vò i gítí ndú.

² Kpêtí ká éno, ndâ 'duù me mbè bà tè gí tàkò có mì ndú ta ndâ i-nò mì ndú náa ndú kèjì gí bà bàkà nò, bìndi ñè kpokèjì mì yúcó bà gii volo 'do gbí có mì ndú.

³ Gbolò njembí ndâ 'duù tí nó náa ndú kèjì gí bà bàkà tí ndú tí ndâ mbe nìbà i nò bà te ndú gítí bà zò yo kařaka gí. Káa wu 'dèè 'do nje có tí nó náa Mbířì waa mítí ndú sàà gí nó lá; à gítí bà mii ndú delè me kponje lá.

⁴ Mbířì táánò si ndâ basìlì mì wó mbe bàkà vò i nó sínò lá. Yí 'vaka ndú gí gbí zàà á tí bàndò mì ndâ vò 'duù gbí 'dí'di'o, gbí ñjì wú kú ù ta ndi o bà waa có mítí ndú.

⁵ Ta o tí nó táánò náa Mbířì ziki ta ndâ vò 'duù muu to tí nó 'dáá gî ta gbolò ngo mù nó, yí si tí 'válá káa Nówà, tí mbe kú ma có ji ndâ 'duù máa,

ndú co tí jáá kpokèjì nó, giì je ndâ 'duù vô-nje só toko mítí wó.

⁶ Ta o tí nó táánò náa Mbíri doo ta ndâ 'duù gbí ndâ gbata Sòdómà ta Gòmórà 'dáá gí ta wu búduú nó, yí bàkà éno tacó wàa ndâ 'duù ñinó ta có bà bàkà vò i gbí njembí ndú nó 'ví ñò ta mbèlè bà bàkà vò i ta ɾo ndú.

⁷ Mbíri 'vala 'do gbí òkò tí ndâ 'duù tí nò náa yí doo ndú nò káa Lótì, tacó yí yuu tí wó gí gbí ndâ i-nò mì ndâ 'duù tí nó náa Mbíri doo ndú nó lá.

⁸ Njembí Lótì, tí tó 'duù mbe kú 'vala gbí òkò tí ndâ vò 'duù tí nò táánò kú mìlisé ta ɾi 'dáá gí ta bà zeke ndâ vò i tí nò náa ndú kú bàkà nò.

⁹ Mbíri bàkà éno tacó bà tubà éno máa, kpokèjì bà 'vala 'duù ñinó mbe kú bàkà go có mì yì nó 'do gbí ndâ i ñinó mbe kú yòngò yí gí gbí vò i nó kuu mì yì; bìndi yí giì da 'bò mítí kò ndâ 'duù ñinó mbe kú co tí lókó-loko kpokèjì nó kú ù ta ndi o bà waa có mítí ndú.

¹⁰ Mbíri bàkà éno kpolo ma tacó tí ndâ 'duù ñinó mbe te njembí ndú gá'dáá mítí ndâ i zuù mì ndú mbe ñikí tí ndú tí ndâ mbe kú ɾo 'dì ta có mì wó tí Mbíri nò.

Ndâ sú mbe ñibà i tí nò wu gbí i lá, ndú bàkà tí ndú tí ndâ cèe 'duù ngé ndii gí, ndú delè te duù mítí ndâ banga i tí nó gbíri nó lá.

¹¹ Káa à kpétí káa ndâ basìlì mì Mbíri náa wotí tí ndú me gbolò ndii ndâ 'duù tí nò mbe bàkà tí ndú tí ndâ mbe ñibà i gí nò, ndú jé waaka có ta rè ndâ 'duù tí nò á kùro Mbíri lá.

¹² Káa ndâ 'duù tí nò mbe bàkà tí ndú tí ndâ mbe ñibà i nò kú bàkà i go ndâ nò gbí jìlì ta muu tí ndú wálá, náa à jò ndú tacó bà zèè ndú, wàa

à 'ví ziki ndú nò. Ndú kù 'dè có ṣónókó gítí ndâ i ṣinó náa ndú 'di gbí ndú lá. Ndú bà mii go bà mii ndâ nò.

¹³ Mbíri bà ko mboo ndâ vò i mii ndú náa ndú kù bàkà nò delè ká ta vò i. I ṣinó mbe me líkí tí ndú nó a bà ja kpá á 'do tí ndâ niì gbí ngbàà ri. Ndâ cè bà bàkà i mii ndú 'dáá káa ndâ i-nò. Ndú delè a ndâ vò mbe ṣiṣi mbe kù volo ṣe yo, náa yo má toko bà zò i-cí-ci ta ndú nò,

¹⁴ tacó ṣo ndú ta o 'dáá gí ká ṣó'dó-ṣo'doo gí tà kpá tí ndâ niì. Ndú a ndâ mbe kù ri gbí tù ndâ 'duù ṣinó ta njembí ndú fúlà-fúlà nò. À kpo njembí ndú ta go'i yù ngbóó gí; Mbíri delè i njà mítí ndú gí.

¹⁵ Ndú biya bà 'di yúcó mii Bìndi-Mbíri gí, kù 'di a 'véṣe mii 'dakò tí nó tí Bàláámù táánò mbe kù zò 've i mii ndâ 'duù, ta ṣe bu wó a Bè'óre.

¹⁶ Bàláámù tí nó táánò tí mbe 'dè kòcò, náa Mbíri táánò je wotí bà 'dè có go i mii 'duù ji kècè mii wó, bìndi kècè tí nó gii 'dè gbí i-mâ mii wó náa yí tí Bàláámù kù bàkà nó ji yí nò.

¹⁷ Ndâ 'duù tí nó mbe bàkà tí ndú tí ndâ mbe niì bà i nò go gùù ngo ta ngo gbí wálá, ndú delè go kùlù mii mbe kù te gbí pípiṣi ká sínò káa mii ni lá, káa Mbíri 'viindi bàndò kù ù ta ndi ndú mí gbí 'dí'di'o ṣinó njikirií nó gí.

¹⁸ Ndú kù mòò ṣo ndú ta bà dè ndâ bodo có kù ri ta gbí tù ndâ 'duù ṣinó mbe njaanga miṣi ndú 'do gbí vò i tí ngù nò.

¹⁹ Ndâ 'duù tí nó mbe bàkà tí ndú tí ndâ mbe niì bà i nò, kù ci ndâ 'duù ta 'véṣe máa, ndú bàkà go có mii ndú gbí njembí ndú, káa vò i da 'bò mítí kò ndú ṣinò ndú gí. Tacó 'duù ta o 'dáá gí a i-zógó-zogo mii i ṣinó mbe gèè bè mí muu wó gí

nô.

²⁰ Káa 'duù ñinó mbe biya ndâ vò i tí nó muu to tí nó gî tacó náa yí ñò Mbe tí ndoo tí mbe 'vala ndoo Jézù tí Bìndi-Mbíri ni gî nó, má ùnje gítí ndâ vò i tí nó káká'i, ndâ vò i tí nó bà gèè bè ndú mí muu wó ndii ñinó sàà á kùro nó gî.

²¹ À delè ngbá ñikì mì ña 'duù tí nó káa bà ñò Bìndi-Mbíri ni kpokoo gî lá, co tí bà ñò yí ni gî bìndi yí giì dele ndi wó káká'i gí bà ùnje gítí ndâ vò i.

²² Tacó ña ñinó náa ña 'duù tí nó bàkà nó ká go có tí nó máa, «Bô dele ndi wó là gaà mì wó,» nô. À delè go có tí nó máa, «Kàdùrúkù náa à caka tí wó gî dele ndi wó gí bà mèrèkè tí wó gbí bètú,» nô.

3

Bà gí Bìndi-Mbíri káká'i wúnò

¹ Ñinó kpónó a bà só bà cu wáràgà mì ye jì yo, ndâ tó kómbe ye. Ye cu mí gbí ndâ wáràgà tí nó sósò'ò nó a có tacó bà je wotí jì yo, tacó bà koṛo cèè có gbí muu yo tacó bà 'va mbí yo,

² tacó wàa mbí yo 'ví dù tí ndâ có tí nó náa ndâ tó mbe 'dòkò có mì Mbíri 'dè sàà nô, delè tacó bà 'va mbí yo gítí có mì Mbe tí ndoo tí mbe 'vala ndoo, náa yo 'di 'do mì ndâ mbe kù ma có mì Mbíri jì yo nô.

³ Kpédélé có náa ye bà 'va gbí tù yo tí a ñinó máa, ndâ 'duù tí nó ta nètè mì ndú a bà ño ndâ 'duù, delè ta bà pà káa ndâ 'dóo ña i mì ndú gbí njembí ndú nó, bà gí gbí ndâ ndòngbú sili tí nó jé'déé kùro o bà gí Jézù káká'i nó, bà gí gí bà ño

yo tí ndâ mbe kù tee njembí yo mítí có bà gì Jézù káká'i nó,

⁴ ta bà 'vee gbí nje yo ta 'viya éno máa, «Jézù tí nó mì yo mbe cí cí táánò máa yì kèjì káká'i nó bà gì ta o ngàyi? À kpónó a o ká too bìndi bà mì ndâ bu ndoo, káa à nò yí lá, 'bí i delè mbe 'visì tí 'do bìndi o bà suu to tí nó wálá.»

⁵ Ndâ 'duù tí nò ta nèté mì ndú a bà ño ndâ 'duù nò bàkà tí ndú tí ndâ mbe ño yúco tí nó máa, Mbíri táánò sàa suu tàrì ta có gbí nje wó nó ni lá, ta tí. Ndú delè biya bà ño ni éno máa, Mbíri táánò suu to tí nó 'do tí ngo ta bà njèè gbí òkò tí ndâ kù to ta ngo nò, ta tí.

⁶ Ndú delè eṛe muu ndú 'do tí bà ño ni éno máa, Mbíri táánò gbí ká o mì ndâ 'duù muu to tí nó 'dáá gî ta gbolò ngo mù nò gî.

⁷ Káa à káa gbèe có tí nò mì Mbíri nò ká kù kpolo tí ndâ tàrì ta to tí nó, kù ù ta ndi o bà waa có ta o tí nó náa yí bà mì ndâ 'duù tí nó muu to tí nó mbe ne 'do tí kpokèjì mì wó tí Mbíri gî nó, 'dáá gî ta wu.

⁸ Káa 'bí có gbaànjé náa yo 'ví ò-bà-mbí lá a ñinó máa, gbèe sili, ta sili zi'duù-vô ta bà muu'bi 'dáá ká gbaànjé kùro Mbíri, ndâ tó kómbe ye.

⁹ Mbe tí ndoo, Jézù 'dèè mé 'dèè gítí bà gì yí go cí mì wó náa yí táánò ci nò, go có tí nó náa ndâ 'bí 'duù kù koṛo nò, lá. Yí ngo've tí wó gítí bà gì lá tacó bà je o jì yo, tacó wàa, yo 'ví 'visì muu ta yo 'do tí ndâ vò i mì yo. Tacó go bà gírì 'bí 'duù gbaànjé 'do gbí òkò tí yo tí wó wálá.

¹⁰ Káa ndoo wúnò bà gu a ndiì ta o bà gì Mbe tí ndoo. Káa ta o bà co rì tí nò tí rì bà gì yí nò, ndoo bà 'di wo wu mbe kù na'va ndâ i tàrì go wo

wu tí gbolò guù. Wu delè bà doo to tí nó ta ndâ i tí nó muu to tí nó nó búduú gí.

¹¹ Ndâ i 'dáá gí lê má kèjì gí bà mì gbí ña kpokèjì tí nò, yo ñindi yo bà ɾi tí ña ñjè ñgàyí? Yo 'vala tí ndâ tó 'duù mbe kù bàkà go có mì Mbíɾi,

¹² si yo kpónó kù ùndi o bà co ɾi tí nó, tí ɾi mì Mbíɾi, tí ɾi bà na'va ndâ i tɾi ta wu nò.

¹³ Káa ndoo kpónó kù ù a ndi ngú tɾi, ta ngú to tí nó tí bàndò bà sù 'bá mì ndâ 'duù ñinó jáá náa Mbíɾi táánò ci ndoo gítí nò.

¹⁴ À má éno, yo lê má kù ù a ndi o bà co ɾi tí nó tí ɾi mì Mbíɾi nó, yo bàkà ndongbú wotí mì yo tacó bà 'vala tí ndâ tó 'duù, tacó wàa Mbe tí ndoo 'ví gí gí bà 'de yo ta 'dê ñjembí yo, ndâ tó kómbe ye.

¹⁵ Yo te mí gbí muu yo éno máa, Mbe tí ndoo gu gítí bà gí lá nò a i tacó bà je o ji yo tacó bà 'vala miɾi yo 'do gbí vò i, á go có tí nó náa tó ná'vindi ndoo Páwòlò, náa Mbíɾi je muu ji yí, bindi yí giì cu ta wáràgà ji yo nò.

¹⁶ Cè bà cu ndâ wáràgà mì Páwòlò gítí ndâ i tí nò 'dáá ká gbaànjé. Káa gbí ndâ 'bí có gbí ndâ wáràgà mì wó kpóló-kpolo ji ndâ 'duù ñinó ta muu tí ndú wálá nò. Bindi ndâ 'duù ñinó ta muu ndú me jáá lá nó kù ñonòkò gbí ndâ kpóló-kpolo có tí nó gbí gbèe ña kpokèjì tí nó náa ndú kù ñonòkò ta gbí ndâ có gbí wáràgà mì Mbíɾi, náa ndú kù mì gbí nò.

¹⁷ À má éno, yo kpolo tí yo, ndâ to kómbe ye, tacó wàa ndâ 'duù tí nò ta gbí có mì ndú wálá nò 'ví soloko yo 'do tí jáá kpokèjì mì yo lá, náa yo lê ñò ndâ vò 'duù tí nò ni gí nò.

¹⁸ Yo zèè có gítí bà bàkà nambeè ta Mbe tí ndoo Jézù tí Bìndi-Mbíri tí kpoò, yo delè 'ví nò yí ni ngbárángà'i.

À ùlù Jézù kpónó, à delè 'ví ùlù yí dúú bà ya tí ! Go-i-tí-nò.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa